

菩薩生地經

吳月支優婆塞支謙譯



南無本師釋迦牟尼佛

说明

本简体校正版《菩萨生地经》电子书，是根据《乾隆大藏经》大乘单译经，第 0374 部，吴月支优婆塞支谦译《菩萨生地经》影印本校正的，标点符号仅供参考。特此说明。

仁慧草堂

二〇一七年七月

● 起诵仪

香赞

(一编)

炉香乍爇. 法界蒙熏. 诸佛海会悉遥闻. 随处结祥云. 诚意方殷. 诸佛现全身.

南無香云盖菩萨摩诃萨 (合掌三称)

南無本师释迦牟尼佛 (合掌三称)

开经偈

(一编)

无上甚深微妙法 百千万劫难遭遇
我今见闻得受持 愿解如来真实义

菩萨生地经

吴月支优婆塞支谦译

闻如是：一时，佛游于迦维罗卫国。释氏精庐。尼拘类树下，与五百比丘众俱。是时，城中有释种长者子，名差摩竭，行诣佛所，稽首毕，一面坐，叉手白佛言：“菩萨何行疾得无上正真之道，普具三十二相，从一佛国到一佛国，临寿终时其心不乱，所生不堕八难之处，常知去来之事，悉成诸法周满达事，知一切法无所罣碍，信解空行，得不起法忍，恒以至心欲作沙门，未曾犯戒，不乐居处？”

佛言：“大哉！差摩竭乃问菩萨之行。忍辱为本，以立忍力乃疾得佛。忍有四事，何等四？一曰，若骂詈者，默而不报；二曰，若挝捶者，受而不恨；三曰，若瞋恚者，慈心向之；四曰，若轻毁者，不念其恶。”

佛时颂曰：

挝骂不以恚	轻毁亦不恨
菩萨忍如是	所问悉可得
慎言不欺慢	未曾起乱意
不犯不有恶	是行得佛疾

开士常以忍	敦诚行大慈
是用得成佛	三十二相明
从事于恶者	常喜加捶杖
害心施于人	是不离恶道
邪见自贡高	急愆好瞋恚
彼为自投冥	终不近菩萨
愚以贪强梁	日用无敬礼
不知孝父母	是以有狱苦
夫欲疾得佛	当修戒德本
依受善师教	等心施于人

“又有四事，行疾得佛。何等四？一曰，爱乐明经，好菩萨道，尽心护法，教诲于人；二曰，远离女人，不与从事；三曰，常好布施沙门梵志；四曰，以不睡卧系心空行。”

佛时颂曰：

若以乐沙门	常勤护经道
爱法不远师	如是人难得
深学求佛意	多闻广开人
好施无悭心	是行得佛疾
女人不可亲	败德乱世间
从事于欲者	未尝近菩萨
是以清高士	常防远女色

净修菩萨道 大悲济天下

于是，差摩竭即解身珠宝瓔珞，用散佛上。佛之威神令其所散，止于虚空，化成宝盖。中有五百化人出，亦解身珠宝，以散佛上，俱发声言：“愿发无上正真道意！”

差摩竭见诸化人，踊跃欢喜，问佛言：“此化所出，从天来耶？四方四隅地中来乎？”

佛报言：“是化不从十方来，亦非天，亦非龙，亦非神，亦非人，亦非地、水、火、风、空，非色、痛、想、行、识，亦非意、非心、非作、非往、非来，亦非今世，亦非后世，亦非生死。是人名化，字无从生，号为空，如影现于镜中，无执无舍，无由来无所得，无我无人，无命无识。若男子、女子，见知诸法如化无识，闻此好信，而行信者，是即佛子。为已去冥，兴世间明，为能降魔，成极大德，是为沙门梵志，为清净菩萨大人，为无从生已得受决，为不退转无上之人，信乐此法为如是也。”

佛告差摩竭：“若闻此经而心惊怪，诽谤形笑，当知是辈非沙门梵志，是为外道放逸之人，为无返复恶师之人，为暗蔽无眼诈称菩萨，是为诬罔抵突之人也。”

于是，弊魔来问佛言：“信此法者，能有几人？”

佛报魔言：“有四百亿欲天及人，皆得无所从生法，乐于中立。是时，差摩竭得不起法忍；五百比丘及五百清信士、二十五清信女，皆得住不退转地，寿终悉当生于西方无量佛清净国，常护持无数佛法，教化成就一切人民，使不退转。如是无极恒沙边劫，当于此土，以次作佛。”

魔闻佛言，稍稍却行，而谓佛言：“后可不须复说此法也。”

贤者阿难白佛言：“当何名此经？以何奉持之？”

佛语阿难：“是经名为菩萨生地经差摩竭所问，当奉持之。百劫行五度无极，而无大智无菩萨者，不如讽诵此经，义以分布，为人说。”

佛时颂曰：

若信学生地经 其功德无有量

斯已度三恶道 后受者福皆然

佛说此已，差摩竭及四辈弟子，诸天龙神，皆欢喜受持。

菩萨生地经

● 结诵仪

补阙真言

(三编)

南無喝啰怛那. 哆啰夜耶. 佉啰佉啰. 俱住俱住. 摩啰摩啰. 虎啰. 吽. 贺贺. 苏怛那. 吽. 泼抹拏. 娑婆诃.

三皈依

(一编)

自皈依佛，当愿众生，体解大道，发无上心；
自皈依法，当愿众生，深入经藏，智慧如海；
自皈依僧，当愿众生，统理大众，一切无碍，和南圣众。

南無佛 南無法 南無僧 (合掌三称)

南無一切如来、应、正等觉 (合掌三称)

南無本师释迦牟尼佛 (合掌三称)

回向偈

(一编)

诵经功德殊胜行 无边胜福皆回向
普愿沉溺诸有情 速往无量光佛刹
十方三世一切佛 一切菩萨摩诃萨
摩诃般若波罗蜜

回向偈

(一编)

愿以此功德 普及于一切
我等与众生 皆共成佛道



此咒置经书中可灭误跨之罪

南无护法韦驮尊天菩萨

